

兩漢三國學案

九

Z 121.6
1
(14)

兩漢三國學案總目

卷一之二

周易

卷三之四

尚書

卷五之六

詩

卷七

禮樂

卷八之九

春秋

卷十

論語 孝經 孟子 爾雅

卷十一

明經文學列傳

兩漢三國學案卷之九

唐晏學

春秋

漢興北平侯張蒼及梁太傅賈誼京兆尹張敞大中大夫劉公子皆脩左氏傳誼爲左氏傳訓故授趙人貫公爲河閒獻王博士子長卿爲蕩陰令授清河張禹長子禹與蕭望之同時爲御史數爲望之言左氏望之善之上書數以稱說後望之爲太子太傅薦禹於宣帝徵禹待詔未及問會疾死授尹更始更始傳子咸及翟方進胡常常授黎陽賈護季君哀帝時待詔爲郎授蒼梧陳欽子佚以左氏授王莽至將軍而劉歆從尹咸及翟方

進受由是言左氏者本之賈護劉歆

張蒼陽武人也好書律厯秦時爲御史主柱下方書漢興以代相封北平侯遷爲計相是時蕭何爲相國而蒼乃自秦時爲柱下御史明習天下圖書計籍又善用算律厯故令蒼以列侯居相府領主郡國上計者十四年遷爲御史大夫文帝立代灌嬰爲丞相漢興二十餘年天下初定公卿皆軍吏蒼爲計相時緒正律厯以高祖十月始至霸上故因秦時本以十月爲歲首弗革推五德之運以爲漢當水德之時尙黑如故吹律調樂入之音聲及以比定律令若百工天下作程品至於爲丞相

卒就之故漢家言律厯者本之張蒼蒼本好書無所不
觀無所不通而尤邃律厯蒼德安國侯王陵及貴父事
陵陵死後蒼爲丞相洗沐常先朝陵夫人上食然後敢
歸家孝景五年薨諡曰文侯

賈誼

見詩

新書

古者周禮天子葬用隧諸侯懸下周襄王出逃伯鬬
晉文公率師誅賊定周國之亂復襄王之位於是襄
王賞以南陽之地文公辭南陽卽死得以隧下襄王
弗聽曰周國雖微未之或代也天子用隧伯父用隧

是二天子也以地爲少余請益之文公乃退

禮天子之樂宮懸諸侯軒懸大夫直懸有琴瑟叔于
奚者衛之大夫也曲懸者衛君之樂禮也繁纓者君
之駕飾也齊人攻衛叔于奚率師逆之大敗齊師衛
於是賞以溫叔于奚辭溫而請曲懸繁纓以朝衛君
許之孔子聞之曰惜也不如多與之邑夫樂者所以
載國國者所以載君彼樂亡而禮從之禮亡而政從
之政亡而國從之國亡而君從之惜也不如多與之
邑

賈嘉

貫公趙人

貫長卿貫公子

張敞字子高本河東平陽人徙茂陵以鄉有秩補太守
卒史察廉爲甘泉倉長遷太僕丞以切諫昌邑王顯名
擢豫州刺史以數上事有忠言宣帝徵爲太中大夫與
于定國並平尙書事以正違忤大將軍霍光出爲函谷
關都尉及光薨山雲以過歸第霍氏諸壻親屬頗出補
吏敞上封事曰臣聞公子季友有功於魯大夫趙衰有
功於晉大夫田完有功於齊皆疇其庸延及子孫終後
田氏篡齊趙氏分晉季氏顓魯故仲尼作春秋迹盛衰

譏世卿最盛迺者大將軍決大計安宗廟定天下功亦不細矣夫周公七年耳而大將軍二十歲海內之命斷於掌握近臣自危非完計也上善其計久之渤海膠東盜賊並起敞上書自請治之乃拜膠東相賜黃金三十斤敞以治劇郡非賞罰無以勸善懲惡吏追捕有功效者願得壹切比三輔尤異天子許之敞到膠東明設購賞開羣盜令相捕斬除罪吏追捕有功上名尚書調補縣令者數十人由是盜賊解散傳相斬捕吏民歛然國中遂平入守京兆尹長安市偷盜尤多百賈苦之上以問敞敞以爲可禁敞旣視事以法捕得百餘人盡行法

罰由是枹鼓稀鳴市無偷盜天子嘉之敝爲人敏疾賞
罰分明見惡輒取時時越法縱舍有足大者其治京兆
畧循趙廣漢之迹方畧耳目發伏禁姦不如廣漢然敝
本治春秋以經術自輔其政頗儒雅往往表賢顯善不
醢用誅罰以此能自全竟免於刑戮後徵以爲左馮翊
會病卒

張禹字長子河內人

尹更始

見穀梁瑕
邱江公傳

子咸

翟方進

見穀梁

胡常清河人

賈護黎陽人

杜鄴字子夏本魏郡繁陽人也徙茂陵少孤其母張敞女鄴壯從敞子吉學問得其家書以孝廉爲郎元壽元年正月朔以傳晏爲大司馬衛將軍丁明爲大司馬驃騎將軍臨拜日食詔舉方正直言扶陽侯韋育舉鄴方正對曰臣聞陽尊陰卑卑者隨尊尊者兼卑天之道也是以男雖賤名爲其家陽女雖貴猶爲其國陰故禮明三從之義雖有文母之德必繫於子春秋不書紀侯之母陰義殺也昔鄭伯隨姜氏之欲終有叔段篡國之禍周襄王內迫惠后之難而遭居鄭之危漢興呂太后權

私親屬又以外孫爲孝惠后是時繼嗣不明凡事多晦
晝昏冬雷之變不可勝載按春秋災異以指象爲言語
故在於指一類而達之也日食明陰爲陽所臨坤卦乘
離明夷之象也坤以法地爲土爲母以安靜爲德震不
陰之效也占象甚明臣敢不直言其事昔曾子問從令
之義孔子曰是何言歟善閔子騫守禮不苟從親所行
無非禮者故無可閒也皇甫雖盛三桓雖隆魯爲作三
軍無以甚此當拜之日晦然日食不在前後臨事而發
者明陛下謙遜無專承指非一昔詩人所刺春秋所譏
指象如此殆不在它由後視前忿邑非之逮身所行不

自鏡見則以爲可計之過者也鄴未拜病卒初鄴從張
吉學吉子竦幼孤從鄴學問尤長小學鄴子林清靜好
古亦有雅材建武中厯位列卿至大司空其正文字過
於鄴竦故世言小學者由杜公

夫戚而不見殊孰能無怨此棠棣角弓之詩所爲作
也

昔秦伯有千乘之國不能容其母弟春秋書而譏焉
陳欽字子佚以左氏授王莽自名陳氏春秋

劉歆字子駿少以通詩書能屬文召見成帝待詔宦者
署爲黃門郎河平中受詔與父向領校祕書講六藝傳

記諸子詩賦數術方技無所不究向死後歆復爲中壘校尉大司馬王莽舉歆有才行爲侍中大中大夫光祿大夫復領五經卒父前業歆乃集六藝羣書種別爲七畧歆及向始皆治易及歆校祕書見古文春秋左氏傳大好之時丞相史尹咸以能治左氏與歆共校經傳歆畧從咸及丞相翟方進受質問大義初左氏傳多古字古言學者傳訓故而已及歆治左氏引傳文以解經轉相發明由是章句義理備焉歆亦湛靖有謀父子俱好古博見彊志過絕於人歆以爲左邱明好惡與聖人同親見夫子而公羊穀梁在七十子後傳聞之與親見之

其詳畧不同歆數以難向向不能非間也然猶自持其穀梁義及歆親近欲建立左氏春秋及毛詩逸禮古文尙書皆立於學官哀帝令歆與五經博士講論其義諸博士或不肯置對歆因移書太常博士責讓之曰漢興去聖帝明王遐遠仲尼之道又絕法度無所因襲時獨有一叔孫通畧定禮儀天下唯有易卜未有它書至孝惠之世乃除挾書之律然公卿大臣絳灌之屬咸介冑武夫莫以爲意至孝文皇帝始使掌故朝錯從伏生受尙書尙書初出於屋壁朽折散絕今其書見在時師傳讀而已詩始萌芽天下眾書往往頗出皆諸子傳說猶

廣立於學官爲置博士在漢朝之儒唯賈生而已至孝
武皇帝然後鄒魯梁趙頗有詩禮春秋先師皆起於建
元之間當此之時一人不能獨盡其經或爲雅或爲頌
相合而成泰誓後得博士集而讀之故詔書曰禮壞樂
崩書缺簡脫朕甚閔焉時漢興已七八十年離於全經
固已遠矣及魯恭王壞孔子宅欲以爲宮而得古文於
壞壁之中逸禮有三十九篇書十六篇天漢之後孔安
國獻之遭巫蠱倉卒之難未及施行及春秋左氏邱明
所修皆古文舊書多者二十餘通藏於祕府伏而未發
孝成皇帝憫學殘文缺稍離其真乃陳發祕藏校理舊

文得此三事以考學官所傳經或脫簡傳或閒編傳問
民間則有魯國桓公趙國貫公膠東庸生之遺學與此
同抑而未施此乃有識者之所憫惜士君子之所嗟痛
也往者綴學之士不思廢絕之闕苟因陋就寡分文析
字煩言碎詞學者罷老且不能究其一藝信口說而背
傳記是末師而非往古至於國家將有大事若立辟雍
封禪巡狩之儀則幽冥而莫知其原猶欲保殘守缺挾
恐見破之私意而無從善服義之公心或懷妬嫉不考
情實雷同相從隨聲是非抑此三學以尙書爲不備謂
左氏爲不傳春秋豈不哀哉今聖上德通神明繼統揚